

广东通志

广东通志

廣東通志卷一百八十

甲子重刊

經政畧二十三

市舶

漢

黃支國多異物自武帝以來皆獻見有譯長屬黃
門與應募者俱入海市明珠璧流離奇石異物齎
黃金雜繒而往所至國皆稟食爲耦蠻夷賈船轉
送致之亦利交易剽殺人又苦逢風波溺死不者
數年來還大珠至圍二寸以下

漢書地理志

唐

王鏐遷廣州刺史御史大夫嶺南節度使西洋大
海中諸國舶至則盡沒其利由是鏐家財富於公

藏

舊唐書
王鏐傳

王方慶都督廣州南海舊有崑崙舶市外區珠琲

秋豪無所索

玉海

柳澤開元中典嶺南選時市舶使右衛中郎將周慶立造奇器以進柳澤上書言慶立彫製詭物造作奇器用浮巧爲珍玩以譎怪爲異寶乃治國之

巨蠹明主所宜嚴罰云云書奏元宗稱善

新舊唐書合鈔

陸贄論嶺南請於安南置市舶中使狀曰嶺南節度經畧使奏近日舶船多往安南市易進奉事大實懼闕供臣今欲差判官就安南收市望定一中使與臣使司同勾當庶免欺隱希顏奉宣聖旨宜

依者遠國商販唯利是求廣州地當要會俗號殷繁交易之徒素所奔轅今忽捨近而趨遠棄中而就偏若非侵刻過深則必招懷失所且嶺南安南莫非王土中使外使悉是王臣若緣軍國所需皆有令式恒制人思奉職孰敢闕供豈必信嶺南而絕安南重中使以輕外使殊失推誠之體又傷賤貨之風望押不出

陸宣公奏議

文宗太和八年疾愈德音南海蕃舶本以慕化而來固在接以恩仁使其感悅思有矜恤以示綏懷其嶺南福建及揚州蕃客宜委節度觀察使常加存問除舶脚收市進奉外任其來往通流自爲交

易不得重加率稅

全唐文

欽定

南海舶外國船也每歲至安南廣州師子國舶最大梯上下數丈皆積寶貨至則本道奏報郡邑爲之喧闐有蕃長爲主領市舶使籍其各物納舶脚禁珍異蕃商有以欺詐入牢獄者

李肇國史補

宋

開寶四年置市舶司於廣州後又於杭明州置司凡大食古羅闍婆占城勃泥麻逸三佛齊諸蕃并通貿易以金銀緡錢鉛錫雜色白瓷器市香藥犀象珊瑚琥珀珠琲鑛鐵鼈皮瑇瑁瑪瑙車渠水精蕃布烏楠蘇木等物太宗時置榷署於京師詔諸

蕃香藥寶貨至廣州交趾兩浙泉州非出官庫者
無得私相貿易其後乃詔自今惟珠貝玳瑁犀象
鑛鐵髓皮珊瑚瑪瑙乳香禁權外他藥官市之餘
聽市於民

宋史食貨志

雍熙二年九月己巳禁海賈

宋史太宗本紀

雍熙中遣內侍八人齎敕書金帛分四路招致海

南諸蕃商人出海外蕃國販易者令並詣兩浙市

舶司請給官券違者沒入其寶貨

宋史食貨志

淳熙

案熙當作化因上雍熙而悞

二年詔廣州市舶除權貨外

他貨之良者止市其半大抵海舶至十先征其一
價直酌審貨輕重而差給之歲約獲五十餘萬斤

條株顆

太平興國初私與蕃國人貿易者計直滿百錢以上論罪十五貫以上黥面流海島過此送闕下官化五年申其禁至四貫以上徒一年稍加至二十貫以上黥面配本州爲役兵天聖以來象犀珠玉香藥寶貨充物府庫嘗斥其餘以易金帛芻粟縣官用度實有助焉而官市貨數視淳化則微有所損皇祐中總歲入象犀珠玉香藥之數其數五十萬有餘至治平中又增十萬熙寧七年令船舶遇風至諸州界亟報所隸送近地船舶司權賦分買時廣州市舶虧歲課二十萬緡或以爲市易司擾

之故海商不至令提舉司究詰以聞既而市易務

呂邈入舶司闡取蕃商物詔提舉司劾之九年

通考

作元祐元年

集賢殿修撰程師孟請罷杭明州市舶諸

司皆隸廣州一司令師孟與三司詳議之是年杭

明廣三司市舶收錢糧銀香藥等五十四萬一百

七十三緡匹斤兩段條箇顆臍隻粒支二十三萬

八千五十六緡

通考作五百六十緡

匹斤兩段條箇顆臍隻

粒

元豐三年中書言廣州市舶已循定案約宜選官

推行詔廣州以轉運使孫迴罷帥臣兼領

元豐五年廣西漕臣吳濟言雷化州與瓊島對境

而發船請引於廣州船司約五千里乞令廣西瀕
海郡縣土著商人載米穀牛酒黃魚及非船司賦
取之物免至廣州請引詔孫迴詳度行之崇寧三
年令蕃商欲往他郡者從船司給券毋雜禁物姦
人初廣南船司言海外蕃商至廣州貿易聽其往
還居止而大食諸國商亦丐通入他州及京東販
易故有是詔凡海舶欲至福建兩浙販易者東南
船司給防船兵仗如詣諸國法廣南船司鬻所市
物貨取息毋過二分政和三年詔如至道之法凡
知州通判官吏并船司使臣等毋得市蕃商香藥

禁物

俱同上

建炎元年詔市舶多以無用之物枉費國用取悅
權近自今有以篤耨香環瑪瑙貓兒眼睛之類博
買前來及有虧蕃商者皆重寘其罪令提舉按察
惟宣賜臣僚象笏犀帶取材舶司每令揀選堪用
者起發凡舶舟之來最大者爲獨檣載一千婆蘭
蕃語謂三百斤爲一婆蘭也次曰牛頭舶比獨檣
得三之一次三木舶次料河舶遞得三之一也

文獻

通考

建炎三年三月癸巳張浚命節制司參議官辛道

宗置海舶

宋史高宗本紀

紹興二年臣僚言邕欽廉三州與交趾海道相連

亡賴之徒掠賣人口販入其國貿易金香以小平

錢爲約詔監司守倅巡捕覺察

文獻通考

十一年十二月丁亥立譏察海舶條法

宋史高宗本紀

十七年十一月詔三路舶司蕃商販到龍腦沉香

丁香白豆蔻四色并抽解一分餘數依舊法先是

十四年抽解四分蕃商訴其太重故也

文獻通考

二十七年十二月甲午詔廣南經畧市舶司察蕃

商假託入貢

宋史高宗本紀

隆興二年臣僚言熙寧初創立市舶以通貨物舊法抽解有定數而取之不苟納稅寬其期而使之待價懷遠之意實寓焉邇來抽解名色旣多兼迫

其輸納使之貨滯而價減所得無幾恐商旅不行
乞下市舶司約束從之旣而市舶司條具利害謂
抽解舊法十五取一其後十取其一又後擇其良
者如犀牙十分抽二又博買四分真珠十分抽一
又博買六分船戶懼抽買數多所販止是麤色雜
物照得象牙珠犀比他貨至重乞十分抽一之外
更不博買且三路船舶各有司存舊法召保給據
起發回日各於發船處抽解近緣兩浙船舶司申請
隨便往船變賣遂壞成法乞下三路照舊法施行
兼商賈由海道興販其間或有盜賊風波逃亡者
回期難以程限乞令召物力戶充保自給公憑日

爲始若在五月內回舶與優饒抽稅如滿一年內
不在饒稅之限滿一年之上許從本司根究責罰
施行若有透漏元保物力同坐從之

文獻
通考

六年詔諸市舶綱首能招誘船舶抽解物貨累價
及五萬貫補助以上者補官有差監官推賞其後
監官等止將海商入蕃興販便作招誘計數該賞
者多而發到香貨下色者皆充數紐估乃詔舶司
相度措置毋容僥倖

同上

謹案通考此則六年上無年號似與上隆
興相屬而隆興止二年則此六年不知其
爲乾道爲淳熙矣

乾道三年詔廣南兩浙市舶司所發舟還因風水不便船破檣壞者卽不得抽解七年詔見任官以錢附綱首商旅過蕃買物者有罰舶至除抽解和買違法抑買者許蕃商越訴計賊罪之舊法細色綱龍腦珠之類每一綱五千兩其餘犀象紫礦乳檀香之類爲麤色每綱一萬斤凡起一綱遣衙前一名部送支脚乘贍家錢一百餘緡大觀以後張大其數象犀紫礦皆作細色起發以舊日一綱分爲三十二綱多費脚乘贍家錢三千餘貫至於乾道七年詔廣南起發麤色香藥物貨每綱二萬斤加耗六百斤依舊支破水脚錢一千六百六十二

貫有奇淳熙二年戶部言福建廣南市舶司麤細物貨并以五萬斤為一全綱南渡三路舶司歲入固不少然金銀銅鐵海舶飛運所失良多而銅錢之泄尤甚法禁雖嚴姦巧愈密商人貪利而貿遷黠吏受賕而縱釋其弊卒不可禁

宋史食貨志

淳熙九年九月乙未禁蕃舶販易金銀著為令

宋史

孝宗本紀

端平元年六月癸巳禁毀銅錢作器用併貿易下

海 宋史理宗本紀

元

至元十五年八月辛未詔行中書省唆都蒲壽康

等曰諸蕃國列居東南島嶼者皆有慕義之心可
因蕃舶諸人宣布朕意誠能來朝者朕將寵禮之
其往來互市各從所欲

元史世祖本紀

二十三年立鹽課市舶提舉司隸廣東宣慰司三
十年立海南博易提舉司至大四年罷之禁下番
船隻延祐元年弛其禁改立泉州廣東慶元三處
市舶提舉司每司提舉二員從五品同提舉二員
從六品副提舉二員從七品知事一員

元史百官志

二十五年禁廣州官民毋得運米至占城諸國出

糴

元史食貨志

二十九年命市舶驗貨抽分中書省定抽分之數